

# Боқий сатрлар

Ҳусайн Бойқаро  
ЖАМОЛИНГДИН  
КЎЗУМ РАВШАН

حسین بایقرا  
جمالینگدین کوزوم روشن

باقی سطرلار

❦ Боқий сатрлар ❦



Ҳусайн Бойқаро

ЖАМОЛИНГДИН  
КЎЗУМ РАВШАН

*Ғазаллар*



Нашрга тайёрловчи ва сўзбоши муаллифи  
Суйима Ғани қизи

Девони Султон Ҳусайн Мирзо Бойқаро,

Қобул, 1346 йил ҳижрий

© Ҳусайн Бойқаро, Девон. Рисола.

Ғафур Ғулом номидаги Бадий адабиёт нашриёти, Тошкент, 1968 йил

### Бойқаро, Ҳусайн.

Жамолингдин кўзум равшан: Ғазаллар/Нашрга тайёрловчи ва сўзбоши муаллифи Суйима Ғани кизи.— Т.: Ғафур Ғулом номидаги Нашриёт-матбаа бирлашмаси, 1991.—32 б.

Шарқнинг жуда кўп шоҳлари салтанатни бошқариш каторида бадий ижод, илм-фан билан ҳам жиддий шугулланишган. Ҳазрат Алишер Навоийнинг замондоши, дўсти Ҳусайн Бойқаро ана шундай шоҳлардандир.

Ҳусайннинг таҳаллуси билан ғоят гўзал ғазаллар битган бу салтанат соҳибининг ижодига Навоий юксак баҳо берган.

Ушбу китобга Ҳусайн Бойқаронинг энг сара ғазаллари жамланди.

Байкара, Ҳусайн. Радует глаза твоя красота: Газели.

Б  $\frac{4702620102-136}{М 352(04)-91}$  Доп 91

Ўз 1  
© Суйима Ғани кизи, 1991 й.

ISBN 5-635-01107-1

## ҲУСАИНИЙ

Ҳусайн биини Бойқаро биини Умаршайх биини Темур 1438 йилда Ҳиротда дунёга келган. 1469-1506 йилларда Хуросон ҳукмрони бўлган. У Алишер Навоийнинг мактабдош дўсти, ўзбек адабиётида маълум из қолдирган лирик шоирдир.

Ҳусайн Бойқаро даврида салтанат пойтахти Ҳирот бутун Шарқда илм, санъат ва адабиётнинг яшнаган марказига айланди.

Заҳириддин Муҳаммад Бобурнинг ёзишича, «Султон Ҳусайн Мирзонинг замони ажаб замоне эди, аҳли фазл ва беназир элдин Хуросон, батахсис Ҳирот шахри мамлу эди. Ҳар кишинингким бир ишга машғуллуғи бор эрди, ҳиммати ва ғарази ул эрдиким, ул ишни камолга етгургай».

Ҳусайн Бойқаронинг турк адабиёти ва тили соҳасидаги фаоллиги диққатга сазовордир. У турк тилида ижод қилишни ғоят олқишлаган, ҳатто маълум асарларга татаббулар қилиш учун фармойишлар бериб турган. Ҳусайн Бойқаро ҳузурида, унинг бевосита иштирокидаги «Олий мажлис»ларда асарлар, шеърят намуналари муҳокама қилинар, адабий мавзуларда кизгин суҳбатлар ўтказилар эди. Бундай қайноқ Ҳирот адабий мактабида Ҳусайн Бойқаронинг бадий истеъдоди чархлана борган ва соҳиби девон шоир сифатида шуҳрат қозонган. Шу боис унинг ижодида кўплаб татаббулар учрайди.

Алишер Навоий ўзининг «Муҳокамат ул-луғатайн» асарида Ҳусайн Бойқаро туркигўй лақаби билан машҳур бўлган «рамали мусаммани максур» вазнининг ғоят раволиғи ва латофатидин руҳпарварлиғи ва салосатидин ўз девонларин... боштин-оёқ илтизом қилиб, бу вазиди тартиб бериб-дурлар эрди», деб ёзади.

«Мажолис ун-нафоис»да эса Алишер Навоий махсус мажлис — алоҳида бобда Ҳусайн Бойқаро шеърятини тадвин қондасига кўра алифбо тартибида таҳлил қилиб беради. Бунда шоир ғазалларидаги мавзунанг баранглиги, бадийиётдаги кашфиётлар, ноёб ташбиҳлар, дилрабо адолат ҳақида атрофли сўз юритади. Шоир тараннум этган ишқнинг қудрати ва ишқнинг изтироблари, нитилишлари, руҳиятига юзланган малуллиқ ёхуд ҳушнудликни ажиб бир дилбарлик билан тараннум этишга ноил бўлганини кўрсатиб беради.

Ҳусайний шеъриятида дунёвий руҳдаги лирика анъаналарига, Алишер Навоий лирикасига таянгани кўзга ташланади. Айни чоқда, унда ижодкорнинг шоирона шуури, бадий ўткир нигоҳи рўйи рост намоён бўлади.

*Сўйима Ғани қизи*

Ваҳки, кўнглум ноласи ҳар дам бузулгон жон аро,  
Гўйиё бир чўғз эрур, фарёд этар вайрон аро.

Хуқкаи лаълинг аросинда эрурму дур тишинг,  
Ё эрур ул жолаким, бўлғай гули хандон аро.

Ҳар киши кўрса парилар ичра сен кўз мардумин,  
Бир парини жилва қилгон соғинур инсон аро.

Онча кон тўкти кўзум ҳажрингда, эй кон тўккучи,  
Эмди кўз очсам кўрармен, оламедур кон аро.

Сел келса жола бирла ўхшатурмен ангаким,  
Кўзларимнинг оқи оккан дийдаи гирён аро.

Истагач мажруҳ кўнглумдин ўкини рашкдин  
Топмасун деб ёшурубмен сийнаи бирён аро.

Икки қошингинг хаёли муттасил кўнглумдадур.  
Бир диловардекки, солмиш икки ё қурбон аро.

Ҳажр гирдобида фарқ ўлдум, каманди васл ила,  
Чек мениким, қолмайин бу баҳри бепоён аро.

Келди ишқимға илож этмакка бир кун бир рафик,  
Эй Ҳусайний, куйди ушбу шуълаи сўзон аро.

Ўтға ёндур сарвни, ул кадди раъно бўлмаса,  
Елга бергил гулни, ул рухсори зебо бўлмаса.

Сарв бирла гул тамошосиға майлим йўқтурур,  
Боғ аро ул сарви гулрухдин тамошо бўлмаса.

Нега сафлар чекти мужгондин, агар жон мулкига  
Кўзларининг майли ҳар дам қатлу яғмо бўлмаса.

Бўлмағай эрди жунун даштида саргардонлиғим,  
Зулфи печу тобидин бошимда савдо бўлмаса.

Гавхари мақсуд толмоқ мумкин эрмас, эй рафиқ,  
Кўз ёшинг то васл умиди бирла дарё бўлмаса.

Соқие, май тутки, хажр андухидин бўлмон ҳалос,  
Ҳар дам илғимда лаболаб жоми саҳбо бўлмаса.

Эй Ҳусайний, бода ичсам ёр алидин тенг дурур,  
Бўлса оби Хизру умри жовидон ё бўлмаса.

\* \* \*

Бўлди гул вақтию мен ҳор ғамидин мубтало,  
Ҳажр ўкидин доладек бағримда юз доғи бало.

Кон ёшимни кўрдигу гулдек кўнгул ҳолини дағи,  
Бу сифат ҳолимни пас оқлида арз эт, эй сабо.

Ғаркамен кўз мардумидек кон ёшим селобигз,  
Оҳким, фарёдима етмас бу кун бир ошино.

Ҳоли зорин сен киби султондин айру тушқали,  
Ёфроғ эрмас, гулғаким юз тил била айлар адо.

Мен билур эрдимки, йўқтур интихо ишқимга ҳеч,  
То гули васлинг била қилдим муҳаббат ибтидо.

Доладек май жомини тутғил ғанимат гул чоғи,  
Ҳосаким ишратка урди булбули бедил садо.

Ғар Ҳусайний топмади барге жамолинг боғидин,  
Бу чаманда, эй гули паврас, санга бўлсин бако.

\* \* \*

Не ажойиб хўй эрур, эй шўҳи сийминбар санга —  
Ким, неча меҳрингга жон берсам, эмас бовар санга.

Ё санга йўқ раҳм, ё пайғомим айтурда сабо  
Қилмади зоҳир менинг ҳолимни, эй дилбар, санга.



Чунки девонангмен, олгум йўк этокингдин илик,  
Гар жафо юз мунча бўлса, эй парипайкар, санга.

Хоҳ жавру зулм кил, хоҳ вафоким, ҳар нафас  
Волаву девонарокдур жони ғампарвар санга.

Хаддин ўткарма Хусайнийга жафову раҳм кил,  
Ким улус шоҳидурур, лекин эрур чокар санга.

\* \* \*

Фурқатингдин йўк эди жисмимда жон, жонимда тоб,  
Кўзда хуноб эрдию ғамгин кўнгулда печу тоб.

Не даме дарду ғамингдин бор эди орому сабр,  
Не замоне доғи ҳажрингдин бор эрди хўрду хоб.

Ногаҳон етти саводи номанг ул жон муждаси,  
Ул сифатким, сафҳан кофурий узра, мушки ноб.

Ўқуғач мазмунини жонсиз танимга берди рух,  
Ўйлаким, Исо дамидин ояти уммул-китоб.

Будур уммиди Хусайнийнингки, етгай васлига,  
Ҳақ насиб этгай ани, валлоҳу аълам, биссавоб.

\* \* \*

Телбараб итган кўнгулни истадим ҳар ён бориб,  
Кўху дарёву биёбонларни бир-бир ахториб.

Топтим эрса ўлтурубтур юз ғаму андух ила,  
Ёр зулфидин батаррак рўзгорин тўнгториб.

Ваҳки, сўрғач ҳолини тинмай тўкуб деди сиришк,  
Етти гардундин фиғону ўтлуғ оҳин ўтқориб.

Вомиқу Фарҳоду Мажнун меҳнатимга тўзмайин,  
Куйдилар оҳим ўтидин ҳар бири бир ён бориб.

Мен дағи тўзмай анинг истаб ватан деб куймакин,  
Юз туман таклиф ила келтурдим они ёлбориб.

Келтуруб чок айлабон кўксумни солдим ўрнига,  
Фуркату куймак ўтидин борисидин кутқориб.

Эй Хусайний, ул келиб тутгач висоли журъасин,  
Тиндуруб кўнглумни мен ҳам ичтим они сипкориб.

\* \* \*

Бир мусофир ой хаёли килди кўнглумни хароб,  
Қолмади жонимға онсиз бир замон токат, не тоб.

Бир арожиф сўз эшитгач ул мусофирдин бу кун,  
Борди кўнглум ўтруву жонимға тушти изтироб.

Васлида кўз гоҳ йиғлар, гоҳ боқар рухсориға,  
Гоҳ ёғиб, гоҳ турғондек баҳор ўлгач саҳоб.

Васли иқболида кўп озурдамен ағёрдин,  
Вах, не толеъдурки, тортармен беҳишт ичра азоб.

Пардадек ул юзга юз суртарга худ йўктур хадим,  
Бас юзум суртарга бўлса муяссар ул никоб.

Сокиё, бир лаългун лаб шавкидин ошуфтамен,  
Тут лаболаб жоми ёқутиға солиб лаъли ноб.

Эй Хусайний, ёр ҳар дам ғойиб ўлгач кеч келур,  
Саҳв эмиш ул нуктаким, эл умр ишин дерлар шитоб.

\* \* \*

Ваҳки, хижрон барқидин тушти шабистонимға ўт,  
Учқуни бирла туташти байт ул-аҳзонимға ўт.

Рўзгоримниму ишк этти қаро ё бўлди дуд,  
Хажр чун ғам дўзахидин солди вайронимға ўт.

Ишк ўтининг шуъласидин куйди кўнглум ё магар  
Тушти сўзон оҳидин, мажнуни урёнимға ўт.

Олам аҳли жонини куйдурди ёлғон аҳд ила,  
Мунча ким берди экин ул аҳди ёлғонимға ўт.

Бода тобидин магар лаълинг бўлубтур оташин,  
Ё магар май ламъаси солди менинг жонимға ўт.

Дедим: «Ўқинг тегса дардим тоғиға ўт чокилур»,  
Деди: «Сув ўрниға бермиш чарх пайконимға ўт».



Гар Хусайний оҳидин ўт тушса ҳар ён, айб эмас,  
Ишк мундок ҳамрах этти оху афғонимға ўт.

\* \* \*

Тўкуб коним, тараҳҳум қилмадинг ҳеч,  
Кўруб ҳолим, табассум қилмадинг ҳеч.

Табассум қилмайин жонимни олдинг,  
Олиб жоним, тараҳҳум қилмадинг ҳеч.

Жаҳон аҳли куюб оҳимдин, эй ёр,  
Бу оҳимдин таваҳҳум қилмадинг ҳеч.

Фироқида, кўнгул, кўп чектинг афғон,  
Висолида тараннум қилмадинг ҳеч.

Хусайний, ҳажрида афғондин ўзга  
Кўруб меҳнат, танаъум қилмадинг ҳеч.

\* \* \*

Тоза бўлди боғу кўнглумда фирок озоридур,  
Жилва қилди гул, нетай, бағримда ҳижрон хоридур.

Сарву гулдин ҳар дам афзун бўлса дардим, не ажаб  
Дардлиғ кўнглум чу ул ҳамдари ёрим соридаур.

Вах, нетай гулнор янглиғ лолалар наззорасин,  
Менки, бир гулрух учун бағримда ҳижрон хоридур.

Носихо, гул гаштидин кўнглум иложин қилмаким,  
Хаста кўнглумга тикилган хор ҳижрон коридур.

Чарх дегандур айирай гулрухунгдин гул чоғи,  
Эй Хусайний, бу фирок у ваъданинг булжоридур.

\* \* \*

Шукрлиллаҳким, жамолингдин кўзум равшандурур,  
Хаста кўнглумга висолинг гулбуни маскандурур.

Ўтлуғ оҳимдинки, ҳажринг ичра чектим шуълалар,  
Шамъи иқболим бу кун ул шуъладин равшандурур.

Дурфишон кўзум жамолинг жавҳарининг аксидин  
Гар бурун даржи гуҳар эрди, бу кун махзандурур.

Не учун гулдек очилмай базми ишрат ичраким,  
Мажлисим шамъи бу кун ул сарви сийминтандурур.

Айш ила ишрат гулин очтинг яна ишқ илгидин,  
Эй Ҳусайний, санга юз таҳсину минг аҳсандурур.

\* \* \*

Фурқатиндин хаста кўнглум қатра-қарта қон эрур,  
Оллоҳ-оллоҳ, бу не ҳажри беҳаду поён эрур.

Ҳар сари юз захм эрур жисмимда, ваҳ, носих тили  
Ҳажр ўқидин ҳар жароҳат ичра бир пайкон эрур.

Кўз қилур бу важҳдин тунлар дур ашқин нисор —  
Ким, ҳаёлинг жон уйида ҳар кеча меҳмон эрур.

Ханжари жаврингдурур ўтлуғ кўнгул осойиши,  
Сув нечукким, ташна лаблар дардиға дармон эрур.

Эй Ҳусайний, ҳажр аро беҳудлуғум айб этмагай,  
Ҳар кишиким, бир пари ишқида саргардон эрур.

\* \* \*

Гунчайи хандон бориб, кўнглумда қолди хор-хор,  
Тинмағур жонимға онсиз дуняда бори не бор.

Сарвқадлар, лоларухлардин очилмас бу кўнгул,  
Ваҳ, нетайким, даҳр боғи ичра йўқ ул гулузор.

Васли жомидин очилур эрди кўнглум боғ-боғ,  
Вой, юз минг войким, ул май бориб, қолмиш хумор.

Қайдаким кўрсанг ани, қулмак била хурсанд эдинг,  
Аксин айла, эй кўнгул, ҳар ерда йиғла зор-зор.

Васл аро ҳар дам санга жоним фидо айлай дедим,  
Невчун, эй оромижоним, айладинг мендин қанор.

Бор дема, жон, сен ғанимат тут Музаффар васлини,  
Қим, ўтубтур дуняда мундоқ балолар бешумор.

Эй Хусайний, ёрсиз сен найлагунг олам аро,  
Кўп адам сарманзили азмин қилиб кейнича бор.

\* \* \*

Ишкни манъ этсалар, шавқим ўти айлар ситез,  
Шуъла янглиғким, нафас таъсири айлар они тез.

Ишқ доим заъфлик жисмимни истар ўртагай,  
Оллоҳ-оллоҳ, неча қилғай барқ хас бирла ситез.

Жузв-жузвим ҳажр аро бир-бирдин айрилмоқ тилар,  
Кош қилсанг ҳажр тиғидин танимни рез-рез.

Тийрадур ул турра гўёким фалак парвезани,  
Хаттинг узра бўлди ҳижроним тунидин мушкбез.

Қоматинг сарви бу оламда қиёмат басдурур,  
Жилва бирла пас яна ҳар лаҳза солма рустахез.

Ёрдин айру тириклик истамасмен, соқиё,  
Ҳажр захридин менинг жонимға бўлғил журъарез.

Эй Хусайний, равза ишқ аҳлиға дилбар кўйидур,  
Топсалар зухд аҳли жаннат, сен анинг кўйида кез.

\* \* \*

Кўз қаросин ҳал қилиб ёздим санга ажзу ниёз,  
Кўз ёшимни ҳам сепиб ул номаға, эй сарвиноз.

Ишқ етгач аклу хушу сабр ҳар ён бутрашур,  
Ўт қаён юзланса вожибдур ул элга ихтироз.

Ошкоро жон агар лаълинг сўзин айтур, валек  
Ёшурун ғунчанг била кўнглумни бордур ўзга роз,

Ул не қоматдурки, барча ростлар айлаб дуо,  
Дерки, бу гулшан аро ул сарв бўлсун сарфароз.

Шавку сабрим нақдини айлай ани кўргач фидо,  
Демаса айб айлаб ул маҳваш буларни кўпу оз.

Чун ҳақиқат нури ул ораз тажаллисиндадур,  
Не ҳақиқат улки, онинг ишқини ўйнар мажоз.

Эй Хусайний, ёр кўйи Каъбаси Наврӯз эрур,  
Не ажаб гар бенаволар айлар оҳанги Хижоз.

\* \* \*

Ул куёш кўйида мен девонани банд айлангиз,  
Бори бу тазвир ила кўнглумни хурсанд айлангиз.

Кўйида мен телбани юз жавр бирла ўлтуруб,  
Ул суубатларни юз девонаға панд айлангиз.

Истай-истай топсангиз кўнглумни ким бузмиш мени,  
Васл тиғи бирла сиз парканд-парканд айлангиз.

Хаста кўнглум заъфи ҳаддин ўтса қувват касбиға,  
Дўстлар, ул юзу лаб ёдини гулқанд айлангиз.

Кўнглокин чок этса ул маст, эйқи айларсиз руфу,  
Риштаи жонимни ҳар ториға пайванд айлангиз.

Кўнглума илму адаб таълими кўп бермак ила  
Вомику Фарҳоду Мажнундек хирадманд айлангиз.

Гар Хусайний десангиз шўроба тўккай талх-талх,  
Хўблар, гоҳи анга бокиб шакарханд айлангиз.

\* \* \*

Ераб, ул гул ичра ғунча нега гуфтор айламас,  
Ё билиб билмасга солиб сиррим изҳор айламас.

Тош ила фўлодға оҳим ўтидур кор гар,  
Не қатикдур ул кўнгулким, ҳеч анга кор айламас.

Ул жафокаш билгай аҳволим қатик саъб эрканин —  
Ким, бўлуб қсчлар ғами ишқин падидор айламас.

Ишқи манъида қилур носих тили кўнглумни реш,  
Йўқса бу ғам ғунчасин тонг ели афгор айламас.

Тўбийи жаннат магар юз ноз ила қилса хиром,  
Сарвинозим оллида ул азми рафтор айламас.

Ой юзунг таклидиға наққоши чин ҳар дам чекар  
Юз рақам, лекин бирин юздин намудор айламас.



Инсу жинга гарчи йўқ ноламдин уйку, вах, не суд --  
Ким, даме ноз уйкусидин они бедор айламас.

Сенки тортиб тиг эл бўғзин чекарлар ҳар тараф,  
Барчаси таъжил учундур кимса зинҳор айламас.

Гар Ҳусайний ишқини иқрор тортар аҳли зухд,  
Ахл-эмаслар йўқса ул бу ишдин инкор айламас.

\* \* \*

Менда ҳар дам юз ниёзу анда истигнову бас,  
Ҳар замон юз жон берай, ул шўх бепарвову бас.

Демангизким, зулфи савдоси ҳазин кўнглунгда бор --  
Ким, эрур девона кўнглумда ҳам ул савдову бас.

Ишқ торожида борди дину исломим дағи,  
Демангизким, бўлмишам девонаи шайдову бас.

Не кўнгулда сабр қўйди, жоним ичра не қарор,  
Йўқки ишқинг ақлу хушум айлади яғмову бас.

Ерга кирсун ашқким, окизди бағрим кон этиб,  
Йўқки махфий сирри ишқим айлади ифшову бас.

Қилмади ушшоқ ақлу дину нангу ном тарк,  
Мунча расволик қабул эттим мени расову бас.

Эй Ҳусайний, ишқ ила чун офият жамъ ўлмади,  
Ҳар не келса урма дам кўнглунг аро асрову бас.

\* \* \*

Ишқ сиррин ошиқ ўлган мубталолардин билинг,  
Васл комин топмай ўлган бенаволардин билинг.

Ишқу ҳажру дард қасдим қилдилар гар ҳолима,  
Воқиф эрмассиз, бу юзланган балолардин билинг.

Танда ҳар ўк захмидин бағримда айланг бир бошок,  
Ул бошокларнинг ҳисобин бу яролардин билинг.

Ишқ аро андуҳу ҳасратсиз нетар кўнглумга заъф,  
Қувватин ул нотавоннинг бу ғизолардин билинг.



Эйки, билмайсиз жунунум, чун сўрарсиз ҳолатим,  
Они шарҳ айларда номафҳум, адолардин билинг.

Билмаганлар ишк бедодини Мажнун ҳолиға,  
Бир жафо мен торткан турлук балолардин билинг.

Рўзгоримнинг қаро бўлганлиги кайфиятин,  
Эйки, билмайсиз, кўзу қоши қаролардин билинг.

Жоми жамлик шоҳларнинг ҳашматин майхонада  
Дард учун синган сафол элтур гадолардин билинг.

Гар Ҳусайний ҳолатин ишк ичра билмайсиз, ани  
Риндлик кўйига тушган порсолардин билинг.

\* \* \*

Тушгали ҳажрингда, эй сарви гуландомим менинг,  
Не кўзумда уйку бор, не жонда оромим менинг.

Еткурурмен шомға ҳажринг кунини юз ранж ила,  
Тонгга, ваҳ, билмонки не янглиғ етар шомим менинг.

Ҳар қачон майгун лабинг хижронида чексам қадах,  
Икки кўз хунобидиндур лаб-балаб жомим менинг.

Сўзи ишқимнинг сабодин, ваҳ, не навъ ирсол этай  
Қим, самум ўлур сабо еткурса пайғомим менинг.

Дегасен, эй нома элтур пайк, зору хастадур,  
Гар Ҳусайний ҳолидия сўрса дилоромим менинг.

\* \* \*

Зулф очиб мен телбани ошуфта аҳвол айладинг,  
Чини абрў кўргузуб кўпглумни беҳол айладинг.

Ўпкали келди кўнгул зулфунг учун, эй сарвиноз,  
Сарфароз айлар маҳалда они помол айладинг.

Жон қушин сайд айламакка лаълинг узра, эй қуёш,  
Донаи меҳр эқтинг аммо отини хол айладинг.

Ҳар қачон дедим вафо қил, айладинг юз минг ҳиял,  
Эмдиким, дедим жафо қил, они филҳол айладинг.

Қатл этай деб келмадинг бошимға, эй сарви равон,  
Ўзгалар қатлиға бўлдунг, муни ихмол айладинг.

Тиғи қатл урдунг кўнгулга, шукр эрур, лекин манга —  
Қим вафосизлар ғамидин фориғулбол айладинг.

Гар Хусайний ҳажр аро деди: «Ғиғон, айлай ғиғон!»  
Шукрим, васлинг била ул дам тилин лол айладинг.

\* \* \*

Ваҳ, не ишдур, кимником мен меҳрибон қилдим хаёл,  
Ўзгалардин ул мени кўпрак қилур озурдаҳол.

Кимником, андин малолат дафъини мен кўзладим,  
Андин ўк бўлди боқиб турғунча, ваҳ, хотир малол.

Оником, мен қилмадим озурда бўлғоч сўз чоғи,  
Қилди ул озурда сўз бирла мени топғач мажол.

Кимником мен истадим бўлғай Масиходек фасих,  
Истар улки мен дам урмай бўлғамен олида лол.

Неча мен васл истасам ул васл аро ҳижрон тилар,  
Ул тилар ҳижрон неча ҳижрон ўтуб топсам висол.

Эй Хусайний, турфа ҳолатдур муни кимдин сўрай,  
Кел яна бир қатла ҳам ул ёрдин айлай савол.

\* \* \*

Ҳажринг ўти жисму зорим қилди кул, эй ёр, бил,  
Гар бино қилсанг мазорим тархин ул кул бирла қил.

Қатл этиб овора кўнглумни бузуг жисмим аро,  
Ваҳ, билиб билмасга сол, эй жон, келиб наззора қил.

Ул каду юз ҳажридин ўлсам, безаб гулбарг ила,  
Туфроғимнинг боши узра сарв эғиб, мил айлагил.

Айлагайлар саъб дардим шарҳидин изҳори ажз,  
Бўлса ҳар захмим оғиз пайкониинг ул оғизда тил.

Гар юзунг бўлса мудаввар, сунбулунг асру узун,  
Ҳеч эрмастур ажаб, невчунким ул ойдур, бу йил.

Эй сабо, етсанг мусофир ойма зинҳорким,  
Ҳажр зиндонида онсиз тийра ҳолимни дегил.

Ишк жомидин бўлубсен, эй Ҳусайний, асру маст,  
Ҳусндин гар бахра топмок истасанг бир дам ойил.

\* \* \*

Чун жунун занжириға бўлдум гирифтор, эй кўнгул,  
Бўлғасен фарсуда жонимдин хабардор, эй кўнгул.

Кочсам ул занжир ила оворалиғ сахросиға,  
Килма ҳолимни хирад аҳлиға изҳор, эй кўнгул.

Қўйки давроннинг жафоойин эли бедодидин,  
Бўлмайин ҳаргиз алар ичра падидор, эй кўнгул.

Анда ҳам қўймай топиб девонадур деб боғлабон,  
Судраб элтур бўлсалар халқи ситамкор, эй кўнгул.

Килсалар ғавғо улус жонимға бедод этгали,  
Мендан ул дам лаҳзае айрилма зинҳор, эй кўнгул.

Шояд ул янглиғ тамошо сори маҳвашлар била,  
Келгай ул шамшодкад, моҳирухсор, эй кўнгул.

Кўргач они гар Ҳусайний янглиғ этсанг тарки ҳуш,  
Ҳасратида килғасен жонимни ийсор, эй кўнгул.

\* \* \*

Қани бир маҳваш анга сўзу гудозимни десам,  
Қани бир мушфикки, бир дам анга розимни десам.

Англағайларким ҳақиқат сирридин холи эмас,  
Эл аро кайфияти ишки мажозимни десам.

Етти чарх авроқи тўлгай етти баҳр ўлса мидод,  
Бир замонлиғ ҳажр аро сўзу гудозимни десам.

Даҳр аро ошуб кўп тушгай, саломат колгай оз,  
Дарду сабрим шарҳи ичра кўпу озимни десам.

Ваҳ, нетайким, нозу истиғносни айлар бирга юз,  
Ҳар нечаким, нуктаи ажзу ниёзимни десам.

Кўзки тардомандур, они не дейин арзир агар,  
Кўнгул отлик сода ринди покбозимни десам.

Дўзах ўлсун масканим гар тўбийи жаннат сўзи,  
Ўтса онинг ўтрусида сарвинозимни десам.

Куймаган парвона мендек, қолмағай ҳижрон туни,  
Базм аро гар ламъан шамъи тирозимни десам.

Эй Хусайний, эл саломат куйидин бўлғай жало,  
Гар Навоий янглиғ оҳанги Ҳижозимни десам.

\* \* \*

Қилган эрмиш ул пари тарки муҳаббат, билмадим,  
Тушган эрмиш жовидон кўнглумга фуркат, билмадим.

Мен анга жонни фидо қилмоқтаву ул жонима  
Ҳажр ўти ёкмиш, кўярға доғи ҳасрат билмадим.

Ошиқ ўлғанда умидим бор эди нўши нишот,  
Анда бор эрканни мунча нишу меҳнат билмадим.

Шуълаи шавқин ёруттум, ваҳки, маҳзун жонима  
Ҳар бир учқун бўлмоғин бир барки офат билмадим.

Васл умиди бирла ишқ осон кўрунди, войким,  
Анда ҳар дам бор эканни мунча шиддат билмадим.

Мубтало бўлғанда ул кофирға қилдим тарки жон,  
Бир йўли барбод ўлурни дину миллат билмадим.

Эй Хусайний, ишқни қилдим ниҳон, қилмон гумон,  
Мунча расволик била тутмоқни шуҳрат билмадим.

\* \* \*

Мен ҳилол ўлдум ғамингдин, сен қуёшсен, эй санам,  
Йўқ ажаб гар мендин ўлса камлигу сендин карам.

Боғ аро хошок елдин ҳар тараф майл айласа,  
Соясини айламас бошидин онинг сарв кам.

Чун ғаму фарёду афғони эрур гул шавқидин,  
Ҳар ниҳол узра агар будбул наво тортар не ғам.



Хар каён сайр этса парвона шабистон сахнида,  
Бор бу равшанким, чекар шамъ ўти кўнглидин алам.

Кўзу зулфунг бирла оғзинг сиррин элтур жон аро,  
Гар Хусайний дарди ишқинг йўлида бўлса адам.

\* \* \*

Оташин хилъат дема жисмим уза, эй дилбарим —  
Ким, эрур ишқинг ўти бирла туташкон пайкарим.

Ё эрур сиймоби деб килма гумонким, ишқ ўти  
Ўртади мажруҳ жисмимни эрур хокистарим.

Дема ахгардек либосинг узра бор сиймоби тун,  
Кулдурур сиймобисию оташиндур ахгарим.

Зийнат учун дема бор жисмингда гуногун либос,  
Ишқ ўртаб сарбасар қилмиш бу зебу зеварим.

Учқай эрдим ҳар замон аз баски тенгмиш новакинг,  
Бўлмаса эрди агар пайконларингдин лангарим.

Кўйида хиштики бир кун кўймишам бош остина,  
Айлангиз зинҳор чун ўлсам лаҳадда бистарим.

Эй Хусайний, бўлмишам зуҳди риёйидин халос,  
Бўлғали муғ кўйи сори дайр пири раҳбарим.

\* \* \*

Тиг ила кўнглумни қилдинг захм, эй сийминбадан,  
Қони турмайдур деб ул захм узра куйдурдинг туган.

Юз тикандек игна бирла, войким, захм айладинг,  
Ҳажр аро захминг аёғига кирибтур деб тикан.

Хайф деб қайғурмағил, жоно, не асиг эмдиким,  
Дарди ҳажрингдин адам сарманзилин қилдим ватан.

Эйки, ёпдинг кўнглума сабру саломат пардасин,  
Пардаи сабр эрмас эрмиш улки бор эрмиш кафан.

Жонға ёр ўт ёкса марҳам ёққанича шод бўл,  
Эй Хусайний, ишқ аро бу навъ эрур важҳи ҳасан.



\* \* \*

Ох, агар кўрсам яна ул моҳи тобонимни мен,  
Бергамен шукронаи васли учун жонимни мен.

Эй мусулмонлар, кўюнгким, сарф қилдим йўлида,  
Зулфидин зуннор боғлаб, дину имонимни мен.

Эшикингда кечалар кўп йиғламоғдин оқибат,  
Ошкоро айладим бу сирри пинҳонимни мен.

Деди охир бор муродимким, сени ўлтургамен,  
Гар сенинг ройинг будур, қилдим бихил қонимни мен.

Неча дерсенким, Хусайний қолмади жонинг сенинг,  
Эй насиҳатгў, нетай бу ёрсиз жонимни мен.

\* \* \*

Гар келиб вайрон қабримни зиёрат қилғасен,  
Раҳм этиб, эй қотилим, они иморат қилғасен.

Қатл аро таслим эрур, эй ҳажр, олингда ажал,  
Неча олиб жоним изҳори маҳорат қилғасен.

Чун кўнгулда қўймадинг орому сабру. аклу дин,  
Эмди, эй золим, бу кишварда не ғорат қилғасен.

Оҳим олида совуқ-солқинсен, эй дўзах ўти,  
Ҳар дам ар юз қатла изҳори ҳарорат қилғасен.

Ул ой истиғносидин афлок эрур паст, эй кўнгул,  
Ҳожат эрмастурки, сен арзи ҳақорат қилғасен.

Неча йил қатлиға маъмур айлабон ул ғамзани,  
Ёшурун, лекин менинг сори ишорат қилғасен.

Эй Хусайний, ишкидин кечкумки, муҳликдур дединг,  
Яхшироқ гар эмди тағйир иборат қилғасен.

\* \* \*

Зулфи ичра хат, хат ичра лаъли хандондур ниҳон,  
Зулмат ичра Хизр ҳам, ҳам оби ҳайвондур ниҳон.

Сехр бирла фитнадин холи эмас кўнглум даме,  
Анда чун бир кўзи сохир, холи фаттондур ниҳон.

Кўнглум ичраким, ниҳондур демангиз, эй дўстлар —  
Қим, ниҳон бўлган кўнгулда кўнглум олғондур ниҳон.

Гунча оғзи нақшиму кўнглумдадур ё тан аро  
Қўп хадангидинму пайкон ичра пайкондур ниҳон.

Бўлса кўнглумда сафову нур эрмастур ажаб,  
Анда у юз шавкидин хуршиди рахшондур ниҳон.

Ишқ сўзин зор жисмимда нечук пинҳон қилай,  
Барқ ўти хошок аро бўлмоқ не имкондур ниҳон.

Эй Хусайний, куймагунча ишқ аро етмас висол,  
Танни куйдур ошкоро, жонни ҳам ёндур ниҳон.

\* \* \*

Ҳеч мусулмонга, нигоро, доғи хижрон бўлмасун —  
Қим, висолингдин жудо бўлса анга жон бўлмасун.

Қўз учидин новаки жаврунг била ўлтур мени,  
Домани покинг, бегим, ногаҳ яна кон бўлмасун.

Хаста кўнглум банди зулфунгдин паришондур басы,  
Жамъ қилғил сунбулунгниким, паришон бўлмасун.

Жонга еттим дилбари нодон элидин, оҳ, оҳ,  
Ҳеч кишининг дуняда маҳбуби нодон бўлмасун.

Жон берурда келиб ўлтур, бир даме кўрай сени —  
Қим, Хусайний кўнглида, эй дўст, армон бўлмасун.

\* \* \*

Кўнглум олур гунчан сероби гуфтори била,  
Жоним ўртар оташин лаъли шакарбори била.

Даҳр бозорида ғавғо солди Юсуф ҳусниким,  
Жилвагар бўлди сенинг ҳуснунг намудори била.

Тиғи захминдин эрур хурсанд кўнглум, эй рафик,  
Екса марҳам, қўй ўлай ул захм озори била.

Маҳвмен андок ул ой хуснигаким, йўктур ишим,  
Ишкининг ихфосию дардимнинг изҳори била.

Елгуз ул ой хажрида саргашта эрмас, менки бор,  
Чарх ҳам бу ишга боис даври паркори била.

Эйки, дерсея топмадим матлубни кўп истабон,  
Билки ул истарда ҳамрахдур талабкори била.

Итларига тўъма бўлғай деб Хусайний кўйди юз  
Ул санам кўйига урён жисми афғори била.

\* \* \*

Хаттининг тори тушубтур лаъли майгун устина,  
Уйлаким жон риштаси бир қатраи хун устина.

Тишлари устида ҳар ким лаълини кўргач, деди:  
«Барги гулдурким, тушубтур дурри макнун устина».

Холининг ҳар дам хаёли телба кўнглумда эрур,  
Зоғлар андоки гавғо қилди Мажнун устина.

Айтғай сарв узра гул пайванд қилмиш боғбон,  
Кимки кўрса оразинг ул қадди мавзун устина.

Янги ой онинг саманди наълидин келди нишон,  
Ул қуёш раҳшин магар секретти гардун устина.

Майға хиркам раҳну мен махмўр, нетти майфуруш.  
Ёна бир паймона ҳам берсанг бу мархун устина.

Сели ашк ичра Хусайний чун кўрунмас, истаманг —  
Ким, кўрунғай тушса бир хошок Жайхун устина.

\* \* \*

Ҳажр шои ой чиқиб, мен йиғлар эрдим дард ила,  
Сайрлар қилдим сени истаб маҳи шабгард ила.

Ой уёққач ёна кўнглумни бузуб ёлғузлугум,  
Тийра шомим андуҳидин йиғладим кўп дард ила.

Чарх ҳам анжум сиришқин ҳолима кўп сочти, лек  
Бўлмади йиғларда тенг мен зори ғампарвард ила.

Мотамимға чарх кўк айлаб либосин, тун каро,  
Субх ҳам айлаб якосин чок охи сард ила.

Шоми хижрондин кутулгунча иситтим меҳрдек,  
Ашк селин окизиб, титраб узори зард ила.

Даҳр бўстониға кўп кўйма кўнгул, эй андалиб  
Ким, анга бўйи вафо йўк юз туман, минг вард ила.

Эй Хусайний, уйку беҳудлук, емак ғамдур менга,  
То не тўлғай окибат холим бу хобу хўрд ила.

\* \* \*

Шоми хижронингни кўргач, келди зулфунг ёдима,  
Тушти субҳи васл умиди хотири ношодима.

Маст эканда демагил, суидум аёғким, ўпкасен,  
Эмди сунгил усрук эрдим анда келмас ёдима.

Мақдамингдин юз хароб обод эрур, эй ганжи хусн,  
Вах, не бўлғай бир етишсанг бу харобободима.

Кайда жаннат сарви бирла хуриға кўйғай кўнгул,  
Ғар малак наззора килса сарви хурий зодима.

Зикридур оғзинда субҳу шом, зоҳид, дема сўз,  
Суди йўк, пандинг билса солма футур авродима.

Ақл кайдидин халос ўлғай эди Мажнун агар  
Ишк таврида кулок солса эди иршодима.

Эй Хусайний, хажр зулмидин неча фарёд этай,  
Бу катик ҳолатда чун етмас киши фарёдима.

\* \* \*

Нуктаи ҳолинг ажаб йўк лаъли хандон устина,  
Ким бўлур бир катра доим оби хайвон устина.

Хажринг ўки то тикилмиш кўнглума, эй қоши ё,  
Лаългун ашкимга ўхшар хори мужгон устина.

Новакингга боққи, доғи ҳасратимдиндур нишон,  
Жавҳариким, кўрунур пўлоди пайкон устина.



Эй сабо, конлик кўзумга кўйидин еткур губор,  
Расм эрур туфрок тўкмак доимо қон устина.

Ишқ тифидин бузуғ кўнглумда эрди чоклар,  
Ваҳки, бўлди бир сари бу доғи хижрон устина.

Лаъли серобинг ғамидин нотавон жисмим эрур  
Мисли хошокеки, тушгай оби ҳайвон устина.

Эй Ҳусайний, ёр келса накди жон айлай нисор,  
Эл сочиқ сочқан киби дилхоҳ меҳмон устина.

\* \* \*

Хатти жонафзо чиқармиш лаъли хандон устина,  
Хизрдекким, соя солгай оби ҳайвон устина.

Уйладурким, захм уза ҳар ён чибин қилгай ҳужум,  
Зоғлар кўнса бу конлик жисми урён устина.

Кўз ёшим селидин ўлмас заъфлиғ жисмим, аён,  
Қайда бир ҳас зоҳир ўлгай баҳри уммон устина.

Кулбам ичра ўртанурмен тушгай олимға куюб,  
Қайси бир кушким, даме кўнса бу вайрон устина.

Бошинг узра гулму сончибдурсен, эй раъно ниҳол,  
Йўкса пайванд айладинг сарви хиромон устина.

Ҳажр ўти бедодидин билгилким, оҳим дудидур,  
Ҳар булутким, соя солгай аҳли даврон устина.

Итларига гар фидо бўлди сўнгакдек пайкарим,  
Эй Ҳусайний, ҳайрат этма, сўз борур жон устина.

\* \* \*

Эй кўнгул, гардун балият тошини ёғдурдило,  
Ҳар тараф сабрим уйи деворини синдурдило.

Қилмади ҳам тарк чун девориға берди шикаст,  
Сели ғам сакфин қаро туфрокқа ҳам индурдило.

Айлар эрдим ишқнинг расволариға сарзаниш,  
Бўлғали расво сўзум лоф эркани билгурдило.



Етса ҳар ғам, илму ақл авроки эрди мунисим,  
Ҳар варакни бир сари оҳим ели совурдило.

Мазраъи зухд ичраким жамъ эрди сабрим хирмани,  
Секриб ул хирманға бир барқи бал куйдурдило.

Офият кунжида доим бошим эрди саждада,  
Ишқ охир мунча шиддат бошима келтурдило.

Эй Ҳусайний, эл эшитмас эрди тасбиҳим унин,  
Ишқ афғонимни гардун токидин ошурдило.

\* \* \*

Ишқ аро Мажнунни дерменки, ўзимга ўхшатай,  
Ҳушини зойил қилиб девоналиғни ўргатай.

Субҳу васлу шоми ҳижрондек неча олам элин  
Булажаб ҳолимға гоҳи кулдурай, гаҳ йиғлатай.

Жон берурмен хажрида, заъфимдин эл кўрмас мени,  
Ишқ аро ҳар неча дерменким, ўзумни кўрсатай.

Унс тутмишмен кийиклар бирлаким, ул шаҳсувор  
Овға келганда анга бу навъ ўзумни учратай.

Чун кўз очмас уйкудин бахтим не суд, эй дўстлар,  
Гар фиғондин ҳар кеча олам элини уйғатай.

Кўксума тош урмоғимни айб қилма, эй рафик,  
Қўйки, анда колғиған пайкёнларини ўрнатай.

Чун Ҳусайний кўнгли ҳар дам бир тараф оврадур,  
Сўз десанг турким, жавобида кўнгулни тўхтатай.

\* \* \*

Эй жафо тиғи, келиб мажруҳ кўксумни ёру,  
Қўл яланг айлаб солиб ҳар ён ичимни ахтару.

Ахтарурда топмасанг ул кўнглумки, мажнуншевадур,  
Ҳар нечук бўлса адам саҳроси сори бошқару.

Бошқарурда бормаса кўнглум адам саҳросиға,  
Тўш-тўшидин санчибон ул сори они қайтару.

Қайтарурда вокиф ўлким, яна қайнаб келмасун,  
Тенгри учун нотавон жонимни андин қутқару.

Қутқарурда нотавон жонимни ул бебокдин,  
Юз жафо айлаб ани келтур қошимдин ўтқару.

Истабон келса яна кўксум шигофин топмағай,  
Ваҳки, бир марҳам кўюб ул чоки кўксум бутқару.

Айласанг мискин Ҳусайний жонини ондин халос,  
Дарди бу бўлғай дуода сен дағи доим бору.

\* \* \*

Эй санга, мажнунсифат, ҳар гўшае девонае,  
Оразингнинг меҳрига шамъи фалак парвонае.

Меҳнати Яъқуб эрур дардимдин, эй жон, шаммае,  
Бўлди Юсуф қиссаси даврингда бир афсонае.

Жону кўнглум бўлди вайрон ишк ўти бирла, не ғам,  
Чун манга бўлди бало кўйида меҳнатхонае.

Ошиқи бечораға чун васл умиди йўқтурур,  
Эмдидин сўнгра фироқу гўшае вайронае.

Ер, юрокимни чикор, бу бевафо жонни равон,  
Жони ман охир уйингда, не тилар бегонае.

Эй Ҳусайний, журъае васли майидин ичмойин,  
Беҳуд ўлдунг, вой, гарким берсалар паймонае.

\* \* \*

Мушкбў хаттинму дей ё лаъли дурборинму дей,  
Кўзи имонинму дей ё зулфи зунноринму дей?

Кавсари лаълинму айтай, йўкса хаттидин анинг,  
Теграсида сабзаи жаннат намудоринму дей?

Сабзаву гулдек хати бирла юзинму шарҳ этай,  
Сабзаву гулдин безалган боғи рухсоринму дей?

Риштаи жон бирла ҳайвон суйидин сўрдинг хабар,  
Белининг торинму айтай, лаъли гуфторинму дей?

Эйки, дерсен ишкида васф айла кўнглунг холини,  
Хар тараф захминму дей ё нолаи зоринму дей?

Дахр боги ўлларида гарчи йўк бўйи вафо,  
Хар бирининг теграсида юз жафо хоринму дей?

Эй Хусайний, демагилким, ёр ишкин шарх этай,  
Васлининг рашкинму дей, хажрининг озоринму дей?

\* \* \*

Эй ажал, осуда кил хижрон балосидин мени,  
Бир йўли қутқар улуснинг можаросидин мени.

Заъфим ошти хажр богида сиришку оҳдин,  
Қутқар, эй васл, ул чаман обу хавосидин мени.

Эй ажал, кўрқутма ўлтургум дебон, ўлтургасен,  
Гар тирик топсанг фироқининг жафосидин мени.

Ишку рашку хажр мухлик, вах, анга жоним фидо —  
Ким, чиқарғай бу балоларнинг аросидин мени.

Хар неча ўтқарса ҳаддин муддаи бедоду зулм,  
Ўтқара олмас висолинг муддаосидин мени.

Дерки, сабр этгил, ҳаками ақл, қилғил, соқиё,  
Бир қадах бирла халос онинг давосидин мени.

Эй Хусайний, салтанатдин онча фахрим йўқтурур —  
Ким, дегайлар кўйининг хайли гадосидин мени.

\* \* \*

Бас эмас эрди манга ҳам ўз ўтум, ҳам ёр ўти —  
Ким, анга афзун дағи бўлмиш яна бир зор ўти.

Ўз ўтум кўнглумга офат, ёр ўти жонга бало,  
Бонси андуху дард ул бедили бемор ўти.

Бу бало барқи, ул офат дўзахи, кўр, турфаким,  
Тез этар бу иккини бир хотири афгор ўти.

Буйла уч ўт бир кўнгулга тушса куймай найлагай,  
Уйлаким, булбул ўтию гул ўтию хор ўти.

Жону кўнглум бирла бағрим куйди бу уч ўт била,  
Яхши боксам юз тамуғча ҳар бирининг бор ўти.

Ўз ўтум ё ёр ўтига гарчи таскин берса ашк,  
Ваҳ, ани найлайки, қилғай юз чақин изҳор ўти.

Гар Хусайнийга бир ўтлук юз ғами ўт солмаса,  
Пас нечук оламни куйдурди Навоийвор ўти.

\* \* \*

Қилмағай эрдим юзин кўрмак таманно кошки,  
Солмағай эрдим кўнгул мулкига ғавғо кошки.

Васл аро тушти кўнгул мулкида ғавғо, эй рафик,  
Қилғай эрди ҳажр ўти кўнглумни яғмо кошки.

Тенгри учун телба кўнглумни итургил, эй сипехр —  
Ким, эмас ҳосил бу беҳосилдин илло кошки.

Ишқ аро расво бўлубмен, бу таассуфдин не суд,  
Ё даригедур ҳар ишнинг зимнида ё кошки.

Ул қуёшнинг накди васли гарчи роҳатдур, вале,  
Қилмағай эрди кўнгул они таманно кошки.

Менки ул ой ишқини қилдим таманно, эй кўнгул,  
Қилғай эрдим зуҳд ичинда дийда бийно кошки.

Чун Хусайний давлати тавфик сандин истади,  
Ушбу ишда солма кўнглига, худоё, кошки.

\* \* \*

Эй ҳабибингдин келиб ҳамдингга ло ихсо сано,  
Ул чу ожиз бўлса васфингким қила олғай яно.

Кому роҳатдур сенинг шавқингдағи андуҳу ғам,  
Айшу ишратдур сенинг ишқингдағи дарду ано.

Ганж топса мунъим ўлмас кимни сен қилсанг фақир,  
Ганж берса муфлис ўлмас кимга сен берсанг ғино.

Кўнглум эт маъмур меҳринг бирла, лекин қўймағил  
Нафс анда қилғали хирсу ҳавас тарҳин бино.



Хаста кўнглумни ўзингдин ўзгадин бегона қил,  
Ўзгадин бегона қилғач, қил ўзингга ошино.

Зулмати ҳижронинг ичра йўл озиб саргаштамен,  
Ўз-ўзинг сори ҳидоят шамъи бирла эҳдино.

Лутф этиб ушшок аро, ёраб, наво қилғил насиб,  
То Ҳусайнийнинг мақоми бўлса бу дори фано.

\* \* \*

Уйлаким, гул ичра гунчанг ҳар неча маълум эмас,  
Гунчаи оғзинг нечаким сўз деса мафҳум эмас.

Ул қуёшнинг партавин кўйида кўрсам йўк ажаб,  
Ҳеч ким жаннатда тўби нуридин маҳрум эмас.

Ишк зулмидин агар Фарҳоду Мажнун ўлдилар,  
Менда ҳар дамдур ўлум, мендек алар мазлум эмас.

Шох ҳукми бирла кўнглум ишк таркин тутмағай,  
Шох эрур ҳоким, вале бу кимсага маҳкум эмас.

Ишқу май журмиға дайр ичра мени ёзғурмангиз,  
Негаким, масжидда дағи ҳеч ким маъсум эмас.

Не балодур ишқким, кўрдум анинг авроқида,  
Дард ила меҳнатдин ўзга нуктае марқум эмас.

Гар Ҳусайнийнинг висолинг давлатидин, эй санам,  
Яъси кўп мавжуд эса умиди ҳам маъдум эмас.

\* \* \*

Заъфдин ўргамчи домиға йикилғач чирманиб,  
Ул чибиндек тўрлади ҳар ён танимни айланиб.

Лайливу Ширину Узро бордилар, ваҳ, не ажаб,  
Бўлмоғим вола сангаким, сен қолибсен сайланиб.

Вомиқу Фарҳоду Мажнун ишқ ўтиға тўзмайин,  
Бордилар, мен қолдим алардин ўтумға чурканиб.

Чурканиб қолғач ўтумға, маҳфий истаб ғайрдин,  
Ўлтурубмен турфа иш, кўрким, кулумни бурканиб.



Хажрида жонимга бедод айласай айб этмангиз —  
Ким, катик ҳол эрмиш айрилмок бировга ўрганиб.

Вах, не толеъдурки, ғам шоми тушимга кирса ёр,  
Бовар этмай уйқудин секриб кўпарман сесканиб.

Ёр кўйидин ўтарда бошима ёгса бало,  
Анда айларман маваккуф ҳар жихатдин куйманиб.

Рақжи хижрон заъфидин тебранмагим имкон эмас.  
Онча кувват қандаким, кўюнгга борсам сурганиб.

Эй Хусайний, жуз фано оҳанги маълум ўлмади,  
Кўйидаким навҳа қилдинг заъф вақти ниграниб.

\* \* \*

Қон кўруб ашқимни кўнглум ҳоласини сўрмангиз,  
Чок ўлуб кўксум жигар парғоласини сўрмангиз.

Азм этиб ул гунчан хандон, адам гулзорига,  
Юз бари очкон сиринким ҳоласини сўрмангиз.

Чунки борди ёшим эмди кўз оқидин катрадар,  
Томганин ҳар ён кўруб ғам ҳоласини сўрмангиз.

Тийра кўнглумда юзин гардинда дардин кўрган эл,  
Ғам тунида ою меҳнат ҳоласини сўрмангиз.

Хажрида кўрган Хусайнийнинг фиғонин, дўстлар,  
Юсуф учун пири Канъон ҳоласини сўрмангиз.

\* \* \*

Баълазин, эй ҳусн аҳли, элни шайдо қилмангиз,  
Бевафалик айлабон оламга расво қилмангиз.

Англам, эй аҳли вафо, гар ўлсангиз тортиб жафо,  
Бевафолардин вафо расми таманно қилмангиз.

Мен асирн ишкмен, ғавго недур уишок аро,  
Эй рафики пандгў, айтингки, «ғавго қилмангиз!»

\* \* \*

Мен ўлар ҳолатдамен, эй ёр кўйи итлари,  
Айламанг ғавго менинг сирримни ифшо қилмангиз.

Ўт тушубтур дашт уза оҳимдин, эй аҳли тараб,  
Лолазор айлаб тасаввур азми сахро қилмангиз.

Сиррин элга ошкор айлар кишига ишқ аро  
Зинҳор ўз сиррингизни ошкоро қилмангиз.

Бир нафас жонон била топмиш Ҳусайний хилвате,  
Боринг, эй жону кўнгул, бир дам алоло қилмангиз.

\* \* \*

Уйлаким, хуршед тоби заррани пайдо қилур,  
Гунча оғзинг сиррини ҳам гул юзунг гўё қилур.

Зеб этар кўк сабзаси бирла қуёш рухсорини,  
Котиби қудратки, хаттинг нусхасин иншо қилур.

Бор экин ошиққа меҳнат ўқларин ёғдурғали,  
Улки муҳгонинг қилиб новак, қошингни ё қилур.

Истади жону кўнгул нақдини, ваҳ, суд айларам,  
Гар лабидин бўсае ул нақд ила савдо қилур.

Ҳажр зулмин кўрки, сабр айлай десам айлар ҳалок,  
Айласам бесабрлик олам аро расво қилур.

Менинг аҳволим кўруб ибрат олинг, эй аҳли ишқ,  
Кимки бир бадмеҳр ишқида ўзин шайдо қилур.

Эй Ҳусайний, чун ул ўтлук чехрадин олсам назар,  
Кўзларимга дарди хижрон кочидин ўт чоқилур.

\* \* \*

Қолғач оҳим сарсариға байт ул-аҳзоним менинг,  
Ёғдурур гарду бало бошимға вайроним менинг.

Ишқ саҳроси аро ҳар сори қонлиғ лоладур,  
Анда бағрим доғидин окмиш магар коним менинг.

Этғали кўнглум паришон менки қолдим билмайин,  
Қай тараф боргани Мажнуни паришоним менинг.

Буки лаълинг тиргизур элни такаллум айлабон.  
Мен билурмен ушбу муҳлик ғамнию жоним менинг.

Новакин чекти кўнгулдин турфа, кўрким, ахтарур,  
Чоклар айлабки қолмиш анда пайконим менинг.

Ошкоро ўтларимга чора қилсанг, эй табиб,  
Они найларсенким, ўртар доғи пинҳоним менинг.

Эй Хусайний, нола қилсам ўлтурур кофир кўзи,  
Гўйиё қўймас ани уйқуға афғоним менинг.

\* \* \*

Эй кўнгул, ул бевафо кўйида маскан айлагил,  
Зор йиғлаб шарҳ этиб ҳолимни шеван айлагил.

Неча бўлғаймен фирокингдин хароб, эй ганжи ҳусн,  
Бир замон вайрона кулбамни музайян айлагил.

Сўрмағилким, гул очилганму экин бўстон аро,  
Бурқаъ ол юзунгдину оламини гулшан айлагил.

Зулф зуннорини судраб, жилвасоз ўл, эй санам,  
Юз туман обидни ҳар сори бараҳман айлагил.

Эй Хусайний, неча ёшурғайсен ул ой меҳрини,  
Оқибат чун зоҳир эткунг эмди равшан айлагил.

\* \* \*

Бу соз фанида қилди сеҳри комил,  
Бу фанга сози бордур асру шомил.

Биз уш чўлдин келиббиз очиб, ориб,  
Бизнингдек бўлмағай оламда сойил.

Кел эмди, сокийи гулчеҳра маҳваш,  
Қўлунгни бўйнума қиғил ҳамойил.

Бизинг парҳезимизни билди хўблар,  
Анинг учун биза бўлмади мойил.

Ҳирининг хўблариға бўлди рамзе,  
Хусайний сўзларидин бўлма ғофил.

## МУНДАРИЖА

Хусайний. Суйима Гани кизи . . . . .	3
«Ваҳки кўнглум ноласи...» . . . . .	4
«Ўтга ёндур сарви...» . . . . .	4
«Бўлди гул вақтию...» . . . . .	5
«Не ажойиб хўй эрур...» . . . . .	5
«Фурқатингдин йўқ эди жисмимда жон...» «Телбараб...» . . . . .	6
«Бир мусофир ой хаёли қилди...» . . . . .	7
«Тўқуб қоним...», «Тоза бўлди...» . . . . .	8
«Шукрлиллаҳким, жамолингдин...» . . . . .	8
«Фурқатиндин...», «Ғунчаи хандон...» . . . . .	9
«Ишқни манъ этсалар...» . . . . .	10
«Кўз каросин ҳал қилиб...» . . . . .	10
«Ул қуёш кўйида мен девонани...» . . . . .	11
«Е раб, ул гул ичра гунча нега...» . . . . .	11
«Менда ҳар дам юз ниёзу...» . . . . .	12
«Ишқ сиррин ошиқ ўлғон...» . . . . .	12
«Тушғали хажрингда, эй сарви...» . . . . .	13
«Зулф очиб мен телбани...» . . . . .	13
«Ваҳ, не ишдур, кимниким...» . . . . .	14
«Хажринг ўти жисму зорим қилди...» . . . . .	14
«Чун жунун занжирига бўлдум...» . . . . .	15
«Қани бир маҳваш анга...» . . . . .	15
«Қилган эрмиш ул пари...» . . . . .	16
«Мен ҳилол ўлдум ғамингдин...» . . . . .	16
«Оташин хилъат дема...» . . . . .	17
«Тиғ ила кўнглумни қилдинг...» . . . . .	17
«Оҳ, агар кўрсам яна...» . . . . .	18
«Гар келиб вайрона қабримни...» . . . . .	18
«Зулфи ичра хат...» . . . . .	19
«Хеч мусулмонга...» . . . . .	19
«Кўнглум олур гунчай...» . . . . .	19
«Хаттининг тори тушубтур...» . . . . .	20
«Хажр шоми ой чикиб...» . . . . .	20
«Шоми хижронингни кўргач...» . . . . .	21
«Нуктаи холинг ажаб...» . . . . .	21
«Хатти жонафзо чиқармиш...» . . . . .	22
«Эй кўнгул, гардун балият...» . . . . .	22
«Ишқ аро Мажнунни дерменки...» . . . . .	23
«Эй жафо тиғи келиб...» . . . . .	23
«Эй санга мажнунсифат...» . . . . .	24
«Мушкбў хаттинму дей...» . . . . .	24
«Эй ажал, осуда қил хижрон балосидин...» . . . . .	25
«Бас эмас эрди манга ҳам ўз ўтин...» . . . . .	25
«Қилмағай эрдим юзин...» . . . . .	26
«Эй хабибнингдин келиб...» . . . . .	26
«Заъфдин ўргамчи домига...» . . . . .	27
«Ўйлаким, гул ичра гунчанг...» . . . . .	27
«Қон кўруб ашқимни кўнглум...» . . . . .	28
«Баъдазин, эй ҳусн аҳли...» . . . . .	28
«Ўйлаким хуршед тоби...» . . . . .	29
«Қолғач оҳим сарсариға...» . . . . .	29
«Эй кўнгул, ул бевафо...» «Бу соз фанида қилди...» . . . . .	30

Ғафур Ғулом номидаги нашриёт-матбаа бирлашмаси  
Литературно-художественное издание

ХУСАИН БАЙКАРА  
РАДУЕТ ГЛАЗА ТВОЯ КРАСОТА

Газели

Художник Герасимова Т.

Тошкент, издательско-полиграфическое объединение  
им. Г. Гуляма

*На узбекском языке*

Адабий-бадий нашр

ХУСАИН БОЙКАРО  
ЖАМОЛИНГДИН КЎЗУМ РАВШАН

Ғазаллар

Нашриёт муҳаррири Усмон Қўчқор

Расмлар муҳаррири Немецкий В.

Техи муҳаррир Р. Раҳматуллина

*Мусаҳҳиҳ Ш. Собирова*

ИБ 4970

Босмаҳонага 15.07.91 да берилди. Босишга 28.08.91 да руҳсат этилди. Бичими 84×108<sup>1</sup>/<sub>32</sub>. Рўзнома қоғози. Адабий гарнитура. Юқори босма. 1,68 шартли босма тобоғи 1,89 бўёқ нусхаси. 1,3 нашр тобоғи. Жами 100 000 нусха. Буюртма 5854. Баҳоси 1 с. 50 т. 40—91 рақамли шартнома.

Ғафур Ғулом номидаги нашриёт-матбаа бирлашмаси. 700129. Тошкент, Навоий кў-  
часи, 30.

Ўзбекистон Компартияси Марказий Комитети нашриётининг Меҳнат Кизил Байроқ  
орденли босмаҳонаси, ГСП Тошкент, «Правда» газетаси кўчаси, 41.